

2846. XIV, 4-26 — Carta de el-rei D. Fernando de Castela, pela qual mandou por seus oficiais entregar a el-rei de Portugal, as vilas e castelos de Moura e Serpa por ele achar que lhe pertenciam de direito. Cidade Rodrigo, 1295, Outubro, 20. — *Pergaminho. Bom estado.*

*Don Ferrando* por la gracia de Dios rey de Castiella de Toledo de Leon de Gallizia de Sevilla de Cordova de Murcia de Jahen del Algarbe e señor de Molina.

A los Concejos e a los alcalldes de Mora e de Serpia salut e gracia.

*Sepades* que yo por actoridade e por otorgamiento de la reyna Dona Maria mi madre e del infante Don Enrique mio tio e mio tuctor e guarda de los mios regnos et por conssejo de los omnes bonos de la mia tierra mande e mando a Estevan Perez alcalde de los castellos desas villas o aquellos que los tienen en su lugar que entreguen luego esos castelos a Johan Rodriguez portero del rey del Portugal en tal guisa que los pueda entregar a Nunno Fernandez cavallero et esto fago porque falle que essas villas e castellos son e deuen seyer de derecho del señorío de Portugal.

*E* porende quitome dessas villas e castellos de Mora e de Serpia e de todo el derecho que yo y avia e de derecho devia aver por qual razon quier e pongo lo todo en el rey de Portugal e en sus sucessores e en el su señorío et quito a vos el omenaje que fiziestes al rey Don Alfonso mi avuelo e al rey Don Sancho mi padre e a mi dessas villas e castiellos.

*Et* mandovos que recibades al rey de Portugal e sus sucessores por rey e por señor e les aguardedes señorío e les respondades daqui adelante de todos los derechos que devedes a responder a rey e a señor. *E* si lo assi non fizierdes mando que cayades en aquella pena que cayen aquellos que menguan señorío a señor de villas e de castiellos.

*Et* yo infante Don Enrique de susodicho tutor del dicho rey Don Ferrando e guarda de los sus regnos por el poder que yo he de tutor otorgo e confirmo todas las cosas de susodichas e cada una dellas.

*Et* porque esto sea firme e mas estable e non vegan en dubda nos el sobredicho rey Don Fernando e la reyna Doña Maria e yo infante Don Enrique tutor del dicho rey Don Ferrando e guarda de sus regnos mandamos seellar esta carta con nuestros sellos colgados.

*Dada* en Cibdat Rodrigo veynte dias de octubre. Era de mill e trezientos e treynta e tres años.

*Gutier* Xemenez la mando fazer por mandado del rey e de la reyna Doña Maria e del infante Don Enrique tutor del dicho rey Don Fernando. Yo Johan Martinez la fiz escrevir.

(as.) Gutier Xemenez

(A. E.)